


青浦縣志

人物五
人物六
藝術
流寓



漢書門類			
九	〇	九	二
一	〇	四	二
一	四	二	架
冊	架	函	號

內閣文庫			
九	〇	九	二
一	〇	四	二
一	四	二	架
冊	架	函	號

內閣文庫			
番號	漢	9092	
冊數	14 (11)		
函號	292	35	

卷三十一
三十一



A 1 2 3 4 5 6 M 8 9 10 11 12 13 14 15 B 17 18 19

Kodak Gray Scale



© Kodak, 2007 TM: Kodak



青浦縣志

卷二十九

人物五

淺草文庫

本朝

宋徵璧初名存楠字尚木舉人懋澄子崇禎十六年進士

授中書舍人差督長蘆鹽課旋充翰林院經筵展書官尋


又差督蘇松四府柴薪銀未復命以遇變歸里人

本朝薦授秘書院撰文中書舍人舟山之役徵璧從征有

功轉禮部祠察司員外郎尋陞清膳司郎中出知潮州府

卒於任徵璧少負才藻工詩詞與其從弟徵輿並著譽望

有大小宋之目陳子龍曰尚木學詩最蚤取裁亦最正自



吾論詩以盛唐爲宗諸子多悔其少作壬申以前惟尚木
之詩爲可存著有抱真堂集

陸慶臻字集生一字薺菴彥章之孫崇禎十五年舉人順
治八年揀選推官不赴慶臻生長華胄以才名重當世既
遭鼎革貧不克葬嘗作墓田丙舍圖泣曰得墓田一笏營
墓足矣遂自稱笏田往來燕晉間依人幕下晚年始杜門
不出而四方賢士大夫造請無虛日年至八十一卒有薺
菴詩稿兄慶曾字子元才情繁縟爲吳偉業陳維崧所推
順治十四年順天舉人以科場事徙瀋陽卒於戍所初慶
曾偕陳子龍禱於于謙祠夢人授以卷軸視之乃遼瀋地

圖意謂必官其地及是始知爲前定也孫瑜字冠吳康熙
五十九年舉人任泰興教諭以樸檢自勵人皆敬之卒年
七十有五

諸舜發字元升號陶叟年十七補縣學生董其昌見而器
之贈以采芹堂額崇禎十二年舉於鄉

本朝順治四年成進士授戶部主事董蘆政以廉幹聞擢
陝西提學僉事清白自矢試卷高下皆手自閱定以疾卒
於綏德州

張安茂字子美號蓼匪以誠第三子少有神解十八補縣
學生時吳中社業以幾社爲首會者數百人安茂常爲之

冠順治四年成進士授工部都水司主事五年充順天鄉
試同考官識熊伯龍文拔之是年冬董造清江浦船務計
厥所造江寧山東鳳陽直隸各衛漕船共五千餘艘安茂
詢訪利病爲國利民漕撫題報遂著爲令六年冬兼管七
省漕儲道事時漕政紛紜悍軍蠹役互爲奸宄安茂申明
令甲一切陋規悉革之八年春兼理鹽政以惜商減稅爲
務晉工部員外郎旋陞浙江按察使僉事提督學政與諸
生約法六條刻先正大家文頒行所屬文體一變尋授陝
西西寧道夷民畏懷番僧攝服邊境以安康熙四年致仕
仕歸里以湖濱漁蕩捐于學宮卒年六十二

席本久字仲遠其先居吳縣洞庭東山遷居珠街鎮縣學
生太倉張采吳江徐汧同郡陳子龍夏允彝皆與周旋劇
切一以道義爲歸居喪哀毀瘠立麻衣蔬食六年又賑飢
收族立祠堂設義塾惠戚黨賙貧交捐葺學舍修治陂塘
施葺置冢飯僧放生行之終身晚築澹香別業手葺朱子
近思錄及張無垢鄒南臯李龍湖會語諸書爲傳心摘要
集年八十卒
陸振芬字令遠號侯菴居辰山弱冠入幾社陳子龍夏允
彝歎以爲不凡順治六年成進士會兩粵未平
廷議破格用人隨大兵進討振芬奏對稱

旨特命爲惠潮巡道是年十二月

王師克南雄七年三月度大庾嶺抵韶州府巡撫李栖鳳
傾心倚毗每事必咨焉時韶陽以南俱送款獨省城未下
督兵攻破之遂同總兵郭虎等由省城至惠州府勦撫歸
善海豐諸寨未至諸寨窺兵寡弱來拒夾師而進振芬選
精銳數百繞出其旁破一隊諸寨股栗于是諭以禍福投
順者踵至至海豐薛進抗守不下振芬與鎮兵駐五坡驛
總兵班某兵亦自羊蹄嶺合攻之兩日城遂下石碣衛等
處相繼歸服八年抵潮州任兩月內聯絡諸鎮檢制之官
招集流亡簡省徭役民始有更生之樂旋署惠潮學政所

錄俱知名士時亂後法嚴府縣往往濫禁無辜振芬定以
逢五十日清理二年之內囹圄一空九年平遠失守振芬
會師進復之時總兵郝尚久于廣東未附時投誠素懷不
軌是年冬將撤以爲水師副總兵尚久知之遂連海寇結
土賊增望樓僭制營建帥府振芬察其逆謀屢牒平南靖
南二藩及巡撫早圖弭變弗應十年春尚久遂自署爲新
泰侯振芬以大義諭禁之不從乃密遣家人告急請兵七
月福建劉固山按劉固山未載何官攷福建省志亦無其人但國初時每遣都統率兵駐劄江海要地而都統國語或稱固山額真或稱固山俺班當是都統而滿洲稱名不稱姓或其人之名上一字作留因訛爲劉或係漢軍劉姓者皆不可知也率兵至潮振芬約爲內應九月十四日

晚掖外兵而上出其不意尚久授首事平引疾歸里優游
四十年始卒先是廣東惠來張庚振芬任學政時試童子
所識拔者也康熙二十七年秋庚以舉人來令青浦首謁
振芬振芬告以地方利弊語不及私子祖彬字孝質天性
友愛收養從子族孫之孤苦及族嫂之孀獨無依者凡數
人葬其疎屬凡十一喪康熙四十八年水災餓殍載道祖
彬貸金糴米五百餘石轉貸之遠近藉舉火者數百家修
復育嬰堂全活尤衆里人賴之年七十有七卒

孫雲鵬字扶雲縣學生居珠谿少能詩及長寄人幕下南
游越北至京師寓青州入西安還登太行由中州上嵩少

可愕可喜之境一寓諸詩又能畫侯恂曹爾堪施閨章柴
紹炳皆與論交而沈荃受業門下最久六十五歲後敷門
不出吳懋謙定其詩同時王璐字爾公由吳縣洞庭山遷
珠谿爲縣學生亦以能詩聞有東臯詩草子珠谿康熙五
十五年舉人任全椒縣教諭以終

田茂遇字楫公號髯淵其先河南人明中葉遷于貞谿少
出夏允彝門下以詩文鳴中順治八年舉人授新城知縣
不赴吳偉業王崇簡魏介等皆重之相與倡和康熙二十
年徵博學鴻詞之士魏裔介薦之

召試臝臺以病罷歸晚築水西草堂藏書萬卷自著俳齋

集又選高言集清平詞燕臺文鈔數種行世時張淵懿字
硯銘居神山順治十一年順天鄉試舉人與茂遇爲忘形
交著有臨流詩雜鵲初集
沈荃字貞蕤號繹堂居沈巷幼孤事母至孝順治九年進
士第三人及第授

國史院編修尋出爲河南分巡大梁道按察司副使時群
盜董天祿牛光天聚衆千餘剽掠許潁間民皆驚竄其勢
張甚荃至明卒伍懸購賞飭軍令遣中軍王福爲前鋒而
身督勁兵繼之殲其渠餘賊解散禹州城四十里外有竹
園叢篁密篠陰翳數里盜窟其中劫商賈殺而埋之荃遣

吏卒收捕發土得屍纍纍盜具伏悉按誅之後以監司入
覲疏陳彰德養馬病民又禹州糧應分上下等皆中利弊
報可康熙元年冬丁母憂服除補通薊道以他事呈誤部
議謫寧波府同知未赴任

召見特旨復正四品仍入翰林其冬補翰林院侍講十一
年典試兩浙未還轉侍讀十二年充日講官起居注十三
年擢國子監祭酒十五年進詹事府右少詹事尋轉左少
詹事明年春晉詹事十九年加禮部侍郎爲詹事時疏言
青宮在於豫養引明臣馬文升言并霍韜聖功十三圖進
之未幾復疏列出閤四事奏上皆報聞故事詹事得與會

議荃於民生利弊時政人材得失剴切詳言畧無瞻徇十八年旱

詔求直言時定新例當流者徙烏喇極北以實邊廷臣集議荃謂烏喇距蒙古三四千里地不毛極寒人畜凍輒死罪不至死者不應驅之死地爲一議上之

詔令畫一荃堅持前議曰此議行三日不雨臣願受欺罔罪

上改容納之越二日大雨盈尺例竟罷先是荃在大梁廵撫賈漠復屬修河南通志旣成上之後十餘年

詔天下郡縣修志一以河南爲法康熙二十三年七月卒于位年六十有一

賚銀五百兩賻其喪謚文恪荃以書名海內三十餘年被聖祖仁皇帝特達之遇日或一再

召見見輒賜茶賜坐上或自作大書令題其後所賜

御書筆墨貂裘文綺不可勝紀殿庭屏障以及御座箴銘皆屬荃書之著有充齋集子宗敬康熙二十八

年進士由翰林院庶吉士累官太常寺少卿亦以工書畫名於時

張有光字星燦號揆原居秦來橋父華順治二年恩貢生

授桐城縣訓導陞湖廣新寧縣知縣不赴卒有光苦志力學與從父淵懿互相砥礪補縣學生時同里包爾庚以文章爲海內宗見有光文曰此舉業正派也順治十二年成進士授工部營繕司主事監督

奉先殿工各省匠役中有老弱病羸求去不得者白于尚書釋之全活者甚衆匠役工食向繇胥役給散每有剋減有光命十日一領親自給發又恐吏胥冒領僭於冊內記其狀貌庶得予大杖而遺之工成

賜緞匹鞍馬獎勵有加監督荊州關稅令商船隨到隨報仍勅其白填流水簿毋得包攬沉滯尋陞本部都水司員外郎授山東南旺河道未幾以奏銷案降級回籍徜徉山水凡二十餘年卒年七十有五

諸嗣郢字乾一號勿菴又號九峯主人其先由琴村遷縣城嗣郢幼爲徐方廣弟子陳繼儒董其昌見之執手摩頂目爲神駒中順治十七年舉人明年成進士未

殿試遭糧案起被斥先是九峯三泖間四方以爲勝地自明以來徐階陸樹聲孫克宏施紹莘李逢申及陳繼儒董其昌輩皆有別業兵革繼作尠有存者嗣郢性耽泉石少時已有買山之志旣錮廢乃搜治巖壑於九峯各有營建歲以三月三日九月九日招賢士大夫爲九峯游且以祀

張翰陸機陸雲顧野王張之象諸先賢四方高人逸士黃冠緇衣無不至至則分題鬪韵文酒之餘間以絲竹俊童妙妓烏履交錯徃徃燭盡漏窮爲歡未已與其會者人人自以爲登仙也時陸振芬周茂源謝官歸皆築室山中相見尤數至如吳偉業黃周星葉方藹歸莊及丹生皆自異縣而至而與方藹交尤厚常約其歸隱九峯故嗣郢築吉亭紉齋于山中以待又貽當歸以諷之康熙二十一年方藹卒於京師未幾嗣郢亦歿年五十九嘗與及丹生撰九峯志未成修青浦志復爲他人所亂非其志也

蔣淑字心一縣學生芝霞港人秉性至孝其母徐氏事祖

姑及姑亦以孝聞無疾而逝淑館於外聞訃奔喪嘔血數升不旬日相繼暴卒人士咸歌詩以輓之知縣李垣給賢母孝子額以旌其廬

唐鏞字歐冶又字冶父能文詩法杜陵始家黃浦上繼遷珠谿與給事中許譽卿諸生王光承友善鼎革後以布衣終兄鉉字玉汝詩文無傳者惟時藝見雲間人文中陸文孫評云襲文雅於南朝振舞鋒于西魏景純五色筆分其餘采尚足令文通擅勝其誇許如此

瞿然恭字欽我明孝子光位之孫幼穎悟年十三補縣學生工草隸雄渾俊逸不可一世甲申後棄諸生益肆力詩

古文詞著平原山人集弟然畏字觀成亦有詩名

陸灝字平遠所題畫白署天乙山人工畫性淳潔時以高士目之吳偉業輩重其人在京師主葉方霽所數年還至山東三登泰山既歸吳告葉淳及弟湜曰余向有山水癖聞尊大人與九峯主人爲性命友可通一語代吾卜居九峯主人者諸嗣郢也嗣郢聞之喜居以陳繼儒古香庭院王雱作送陸高士入山圖同人皆賦詩贈之江陰舉人惠潤題其卷云高士入山有十善山中得隱君子一也新彭仙壇奉陳公祠二也耕雲道人曹昉自號不孤三也與墨公北公鐵中公可公諸上人重闢東林四也山中素心倡和

五也桂花有託六也可作九峯賓主圖七也招認菴宗伯結隣八也峯盡仰出徜徉山水間九也高士喜得九峯九峯亦喜得高士十也

周篆字籀書父灃青浦人徙烏程篆復遷吳江嚴墓少穎敏好學能詩古文弱冠問學於顧炎武告以學須務本遂博究經史已而遍游南北參文武幕府於河渠兵農錢穀之事益加諳練凡所著述切中當時利弊年六十五卒著有草亭集蜀漢書杜詩集說子廉字來叔善詩有匏園集陳麀字機來父功邑名士麀少承父學才氣卓越善詩畫以諸生高等應試南闈輒報罷病卒其前有許岳允字文

伯瞿一潢字貞子曹鳳苞字授章皆以高才通古學不遇
鬱鬱而沒

周洽字載熙號竹岡居郊店六歲母亡能執禮盡哀每出
聞隣姬呼兒聲輒悲泣姬怪問之曰痛我無母呼也年十
六七貧甚欲執一藝爲菽水資遂學畫於趙伊不數月盡
其技遊揚州縱觀前人名蹟而泰興季氏所藏尤富洽日
夜臨摹學益進山水人物蟲魚花鳥無不力追古人遠近
諸公貴人爭延致之在河道總督靳輔都統胡啟元幕下
最久諸人知洽有才不敢目以藝士在福州時總督姚啟
聖調諸道兵征臺灣駐城外一日忽移城中城中人皆恐

而啟元亦未測總督意疑有變急召部下兵使與連營相
次以脩非常洽聞之入見啟元曰公此舉得毋以總督召
兵入城故冀以制之乎啟元曰然洽曰公與總督身爲大
臣旣自相疑軍中逆探上意疑忌轉甚或語言失好或乘
酒使氣勢必大闕不可禁止是非所以制之乃所以激之
也啟元曰然則奈何洽曰某觀總督忠誠無他慮此舉不
過欲耀武於衆耳公誠減騎從往過美其軍容之盛因微
諷以地方當兵燹後靜鎮爲先一旦兵民雜處雖軍令嚴
肅而小民無知必致惶擾奔竄恐乖公平日所以愛民之
意如此則彼必喜公之推誠且理無以奪慮無不樂從較

之顯示猜防以啟無窮之釁者相去遠矣啟元猶豫不能
決洽出復以危言動其子琪俾入言之啟元從洽言兩人
歡好如初又在潮州知府梁文暄所方夜半總兵據縣詳
文云甲首乙交通海寇宜急發兵掩捕文暄卽臥內告洽
洽曰此事所關雖大虛實未可知若遽嚴捕酷訊以實人
罪不惟玷政聲恐天道可畏也文暄瞿然洽曰今海宇寧
謐人無異志是奸民陷害良善耳宜拘乙卽訊而緩其刑
使不致妄承然後密訪甲素行若何并查與乙有無仇釁
則陷害之迹昭然事可立斷文暄如其言乃知甲售田于
乙因加價構訟不勝而陷之者也在靳輔幕時河工始告
成輔欲繪黃運兩河圖呈

覽以事屬洽洽曰歷年所進河圖多不稱

旨非親歷其山川城郭則位置不能無誤也乃請曰行于
是徧歷兗豫雍冀四州之地閱四月行萬餘里相度河勢
迂直緩急及堤閘要害之處手自摹寫而別爲看河紀程
三卷繪以進呈

上覽之下旨褒美其後河道傅澤洪撰行水金鑑悉載其
書未幾輔營屯田卽家請洽俾監其事洽辭而輔與幕下
士陳潢強之不已洽感知已意又不欲居任事名乃密視
原隰高下蓄洩種植之宜出入菱茅斥鹵間幾二載悉心

區畫盡讓其功于潢會輔以用久不樂者衆而任事之不肖者又徃徃乘勢侵斂言者遂交章劾輔輔罷潢亦繫獄而洽以不受職獨免於禍禍之將作也輔才潢欲題補參政道與共襄事洽沮潢曰公世所指目以在幕中故無從下石耳一出禍且不測盍堅辭之潢不能用及疏出攻者羣起于是服洽之先識焉洽晚讀王守仁書覺生平所疑渙然冰釋不復留意于繪事然興至時欣然弄墨人爭以價購之年七十五卒有攤書閣詩文集藏于家

程化龍字禹門一字從王號念劬休寧籍移居青浦父大任任俠好義里人貧將鬻其妻大任罄橐金周之得免有富豪速仇于獄大任力雪之他隱德多類此化龍少失怙事母以孝聞受業於王九徵之門康熙九年成進士考授內閣中書舍人尋以事降謫歸先是兄含文歿於南雄化龍徃尋骸骨於巒山瘴水間不得招魂設祭聞者哀而義之從叔周量兵亂卒於官出貲治其喪而還鄧漢儀稱其質雅恬秀妙中規矩爲山巨源劉真長一流人云

沈麟字友聖居青龍江能詩吳偉業孫承澤及一時名士皆重之漢陽顧如華官御史京師與爲布衣交及如華按吳數顧其廬又大會賓客於虎邱使麟攝衣冠登上座其相得優禮如此如華使竣歸卒於楚麟不遠千里奔赴其

喪人皆義之麟妾亦能詩其往漢陽也妾賦詩贈別惜姓氏不傳

董黃字律始其昌再從子居余山隱居不試所作才情綺麗取則徐庾尤工於詩子枏字少楹縣學生亦以詩賦見稱

張集字殿英號曼園晚號慕庭康熙十五年進士授行人司行人十八年頒

詔粵西還逾年授監察御史先是民田有五年一丈量編審之令官既借端擾民而黠胥奸吏指瀕水所漲尺寸地咸以為漏稅若蘆蕩責令陞科歲歲查詰磨其餘乃已民

以為累集奏除之二十五年擢左僉都御史是年冬遷戶部倉場侍郎舊例有簞錢一項以恤運丁久為吏胥中飽集仍以給之二十七年進吏部右侍郎未幾轉左丁憂歸


三十三年以兵部左侍郎召供職凡七年會得痰眩疾乞歸尋卒年六十疏聞

特賜一品祭葬

朱袞字秩公一字慎思先世自休寧移居珠街鎮父天瑛字漢融嘉善縣貢生從陳子龍夏允彝遊有聲幾社間晚

年屏跡城市以詩酒自娛著鴛湖維唾壺醉里諸集衮幼承家學篝燈夜讀暑月嘗納足于甕以避蚊蟲其刻勵

幼承家學篝燈夜讀暑月嘗納足于甕以避蚊蟲其刻勵



如此尋補秀水縣學生康熙十五年成進士十六年考取內閣中書舍人以選途壅滯至二十五年改授江西樂平縣知縣樂平人生女輒溺衮嚴禁之或庶得姓名則呼其人至庭下諭以天性所關何忍爲此民皆感動縣徵輸有縣總都頭鄉約都約諸名色爲民間累衮知其弊亦皆禁止江西火耗每兩加至一錢五分漕項陋規每石亦然衮悉照賦役定額減除過半修學宮重建慈湖鵝湖書院二十六年充鄉試同考官二十九年以新例不得再入內廉遂掌膳錄曰我因名場久矣習知士子佳卷率爲膳錄所誤敢以外廉而忽諸檢閱改正無舛錯者巡撫宋犛將以

卓異薦而脚價之議起先是江西因漕艘不能抵河埠募夫挑運遂有是項至是總漕某蒞任謂他省無此名色不准開銷咨部追賠降級調用三十二年再起補授山西大同縣知縣時厄魯特猖獗

聖祖仁皇帝出塞親征前後養兵大同者半年有餘凡隨駕文武內外官員及滿漢東三省兵官跟役餘丁共數萬衣甲弓箭槍礮粟米草豆牛羊騾馬旗纛帳棚等又計數百項皆責成取給於大同袁晝夜調撥屢勉從事未嘗有缺乏會巡撫新舊傾軋罣誤罷官當事惜之未幾終於客館年七十

葉之奇字汝正號鶴洲孝子瀛曾孫五歲喪母哭泣如成人十三歲喪父慟絕復蘇祖母保護之得無恙事祖母以孝聞奉季父母如所出補縣學生家業鹽鹺資本頗裕性好施康熙九年大稜罄儲粟爲粥又作餅餌分給老穉之不能就食者十九年水災之奇倡捐全活無筭見途中抱布買銀完急餉者倉皇不欲生補金助之邑有

先聖衣冠墓在孔宅去孔宅數里有梁紇浦土人立廟之奇以爲非禮因相孔宅廟左餘地倡建啟聖祠爲文以勒諸石初康熙八年諸生上其孝行學政與巡按御史旌其廬卒後入祀鄉賢祠又以之奇功在聖祠令附主于孔宅

兩廡春秋祀焉子承謨字陞陳自幼聰穎群書博覽邑歲貢生修大成殿起

萬壽塔施燔施衣立義冢見善必爲各憲給獎扁額後以子貴

誥封奉直大夫舉鄉飲大賓卒年八十四孫本別有傳

曹紳字顓書號雍齋縣學生知白之後祖世臣字繩西父際飛以貢生授臨城縣知縣有政聲紳幼英異能文與兄純弟國維並以才稱于時由貢生謁選得泰順縣知縣邑在萬山中地瘠民貧號稱難治紳至盡心撫字民樂而安之先時審丁胥吏作奸貧富不得平紳令民自實不得隱

仍置舉首法察出五家連坐由是無脫漏者丁增於昔三
倍而銀不加額每三丁而當一丁之賦力輕易辦上司稱
其能以丁外艱解任歸遂不復出國維字四張少慧工詩
康熙二十一年成進士官內閣中書舍人早歿

屠旭字初生邑廩生家於珠街角鎮以詩鳴爲人淡宕詩
亦如之著有刪餘集長子文漪字漣水號蕤洲婁縣學生
善筭術著九章錄要人稱其簡括次子宸楨字周士太學
生兄弟咸能詩詞食貧攻苦互相倡和凡守令至皆敬而
矜式之文漪有漫吟草詩餘草宸楨有醉經草堂稿滄浪
漁笛譜大抵詩儗石湖誠齋駸駸入室而詞則玉山碧曲
之亞也

陸祖修字孝武號敬峯父從龍性孝親疾衣不解帶者三
年鄉黨稱之祖修康熙十八年進士選庶吉士授編修改
山東道監察御史以言事罷築老是菴於佘山居之祖修
初尚意氣蠶厲敢言亦頗抵斥佛老晚年皈心乾竺乃自
稱老是頭陀云

王喆生字醇叔少孤母朱氏撫之成立師事朱用純能得
其傳康熙十六年舉順天鄉試第一二十一年成進士選
庶吉士授編修二十四年充會試同考官旋以養母乞歸
絕意仕進讀書自重巡撫趙士麟宋犖皆推重之著懿言

日錄亦爲張伯行所稱卒年八十一從弟元臣字聖誠居
珠街鎮康熙九年進士歷任浙江會稽湖廣鄆邳陽知縣
乞休歸里優游林下數年而卒

張翼字豫章自號九峯散人以字行若羲之子與弟嘉樹
玉樹並以文名吳下有三張之目康熙二十七年進士第
三人及第授編修三十年充會試同考官尋陞左春坊左
中允提督貴州學政士子皆敬仰之入爲國子監司業旋
卒翼少好遠遊登泰山溯越江遍訪西湖名蹟過梅嶺入
粵東登山臨水一發於詩有南帆寄亭諸集宋琬稱爲海
涵地負興會包舉周亮工稱爲下兼開元上軼漢魏非胸
有千古不能也

鄒允颺字彥康號南園以歲貢選寶應縣教諭康熙二十
一年擢湖北當陽縣知縣當陽山谿深險前遭流寇殘殺
邑爲之空

國初餘孽尚踞竹房諸處軍興旁午咸取給於民名曰差
費外此上司節日壽辰餽送所需暨公務派民協助者較
諸正供至踰數十倍縣令因以居奇費一徵十其間士大
夫濫免刁民抗徵以至胥役土豪蔽窟其中窮簷困於供
億積四十餘年民力益億允颺至痛革其弊縣屬稅銀三
千二百兩有奇漕米八百餘石聽民以時自封投納額內

無加耗額外無私徵相沿陋例次第釐剔其奏銷公費及奉派雜項皆官自爲償浮費照前諸任亦什減八九餽遺悉從脫畧上官胥差抵縣絕不假以詞色後亦罕至意雖銜之無以中也初到任有紅船之役求免不得具陳所費上官謂可倚於民令集縉紳議之衆欲循例派民允颺曰他縣水次造船取辦猶易爲力今邑處萬山中寧能陸地造乎青邑向不派修此例一開是貽民無窮之累也乃使人於漢口修造自出銀五百兩絲毫不取於民後亦不復派也二十八年旱災繪圖上

口逃散田委榛莽允颺勸民耕墾聞風歸者如市乃出示新闢地畝果能熟者報官准照下等田六年後起科其舊墾未報者亦依自首律呈報不窮已往又有賠荒爲累者亦許開報核實緩其徵秋禾難熟半仰給於蠶麥允颺春日開徵不差催不勾搆出片紙令牌甲按戶分給無驚擾也隣邑潛江飢上官委以履勘自持糗糒躬親履畝隣邑令具盤殮供帳悉却之瀕行者老醵金以獻允颺曰若等方呼庚癸顧歛財爲壽乎隣民猶吾民也吾寧有歧視耶以十分災報潛江人德之慎於刑獄未嘗妄杖雖盛怒應盡法者必未減之尤善察隸卒用刑之弊曰隸得人賄用

輕刑猶可若挾宿怨及受仇家錢毒刑害人上不之察受
寃者何所伸乎已受刑者不更加以他刑重罪荷枷與入
獄者以時體察審其疾痛時其起居飲食無寃死者嘗曰
服官者初刑人必有傷懼之色久之而如擊土石如艾草
芥矣人已一體其可以

國法適喜怒耶惟窮惡大逆擒治如律不少貸以爲蝨賊
不去嘉禾不長也犯竊者痛治之人病其過曰大盜起於
小竊今小懲而大戒所謂以囹圄爲福堂也賭博奸淫犯
不輕貸以爲風化所關不特近盜近殺而已康熙二十八
年夏夏保予以裁兵倡亂竊據武漢黃德四府勢極猖獗

距當陽城二百里邑多深谷叢薄而舊裁之兵間處其中
人懷觀望衆議繕樓櫓治鄉兵禁民出城及他徙甚有勸
修山砦以爲縣官避兵地者允颺曰何事張皇以驚擾吾
民視事如常而密約邑中士大夫之曉事者曰邑破君家
亦不可保若不爲

國計寧不爲家計乎陰令合家僮暨村邑中勇悍少年遷
入城內四門近處檢役隸中之幹而強者習武脩授以庫
械復召遠近裁兵諭之曰吾觀若等力未衰今能爲我守
護吾給若等貲糧且爲言於上皆踴躍聽命於是城外村
墟悉置木柵圍聚什伍扼險要脩軍需人有固志會賊旋

平乃撤脩方賊之未平也或勸先遣家屬從間道歸江南
允颺曰家屬苟一出城人必以爲賊至遠近震恐人情瓦
解非計也且賊苟得志則所在荆棘江南其可得至乎不
如堅守或有完理設賊果來攻一旦力不能支則一門忠
孝不猶愈死於道路乎聞者感動邑有烏槍手三十名漁
船數隻徃例三九兩月有擊鮮之令允颺曰仁民愛物同
理也奈何以口腹之供多殺物命終任未嘗取給焉上元
父吏請循例諭里民張燈爲樂允颺曰張燈之弊遊蕩一
也爭鬪二也火災三也充其類而盜賊奸邪每乘間而起
司土者在所宜禁可更張之耶自奉甚儉一袍歷十數年
食無兼味居官七載家益落不知者多笑爲拙而允颺方
以自快也三十二年以卓異薦

命以主事同知陞用旣去任民皆繪像事之三十七年間
姊喪悲悼而卒

沈白字濤思號賁園又號天庸子父鳴求棄諸生隱于諸
翟鎮之梅花源故王圻別業也歿後學者私謚貞愍白以
布衣耽高尚闢所居而廣之有蕭閒堂海榮徑諸勝工書
真行草皆入妙亦善山水縱橫踈快有別趣著樗亭詩稿
行世

楊世植字仲節生而孝友伯父得錮疾目盲世植引以同

居生養死喪無不脩禮及壯補郡學生爲文章和緩詳贍亦能詩游荆襄間所作尤夥不喜誇於人故知之者鮮子烈縣學生亦能傳世業

陳昂字書厓候補府同知嘗居秀水之梅會里移居珠街鎮好賓客尤與秀水朱彝尊交善家多書畫皆以圖印識之有別業在澱湖濱

畢大生字雨稼一字豫瞻邑貢生少有才名爲詩以范成大陸務觀爲宗書學李邕又工填詞所作帆影簾影諸闕盛爲時賢矜許秀水朱彝尊及子文登華亭高不騫海鹽查慎行嘉善魏坤皆與友善游京師久之無所遇還客山

東以諸生終無子有秋蘭介雅堂詩宜與蔣景祁刻之弟大啟字載積能畫竹有名於時

周綸字鷹垂號白民茂源子隨父客京邸頗有名董含董俞田茂遇諸人俱重之康熙十八年歲貢授國子監學正爲新城王士正所知生平以經世爲志嘗上巡撫湯斌書云松江地丁漕白明朝有北運有收兌有經催

本朝定鼎一革白糧北運再革漕糶收兌均田均役復革銀米經催小民按畝輸官卽各寧家鼓腹此真生逢堯舜頓離焚溺獨漕白二糧不比銀錢輕易况起解條銀扛費水脚不致官爲民代若旗丁由單石數內有正有耗而外

船隻有給行月有給五米十銀有給所患層累扣尅病軍
卽以病運耳至官爲民收官爲民兌前此里排會議松江
澤國米性潮濕民間倉棧積下旬日不加搗颺卽便浥爛
故議搗颺風刮量加三升恐納戶不能粒粒揀剔以稽開
兌以誤淮限也貯米在厥潮水地面土氣上蒸務脩蒲包
墊草又加一升二合鼠耗三合至華婁兩縣除白糧官廳
係屬官占而漕米倉房俱借之民其地基糧白理須給價
完課故每石又加五合而修倉房買蘆席礮糠鎖鑰風車
筩斗栲栳斗斛籌棒斛單串張油硃及倉夫執單紙張貼
旗軍臨兌駁船發挑夫開兌脚價與凡僱募書算僱募斛
手工食等項原議七分前此上下分肥斛斛淋尖高至四
五指每石加八升之米變爲官加一私加一而七分之費
大戥秤收起籌出串項項勒索誠如今總漕請釐三害等
事疏內收米一石止作七八斗脚價江浙反無額設民間
私貼尚止銀三五分米三五斗乃湖北編有折銀三千九
百餘兩每石復幫貼至一二錢江西已編脚價銀三萬四
千五百餘兩每石復徵收水脚銀三錢五分及三錢二錢
五錢不等均宜查革部議湖北江西既有額編脚價何得
又行分外私徵贈貼等項傳述之頃歡聲雷震獨是松郡
幸賴廉明知府魯超於康熙十五年下車以來恰值華亭

知縣南 婁縣知縣史 兩賢令接踵莅任革去種種
陋弊俯准芻蕘荒區另編緩比秋成儘頂十銀爲數適足
相當不至蒿萊日甚且詳明督撫官斛之上釘置斛攬形
如卜字上下兩環復將七分之銀詳減二分八升之米詳
減三升比時傳集里排黃髮皤皤交口稱頌咸謂米色略
可通融使民易得上納則此三升之減猶懼不可經久以
累官長今華婁上青一槩不收誠恐賠累在官一朝卸擔
官何取償變爲區收區兌則向來蘇州之官爲催比民自
脩厥攢費及至出兌之後纔給印串風雨火盜時刻憂虞
陽奉官收官兌之旨實則官催民收官兌松爲樂土相去
霄壤爲此呈具松江官收官兌原議并均編要略均役成
書三冊伏乞主裁又爲松江士民陳明浮糧云恭讀
諭旨故明洪武因有仇怨于民或一處錢糧徵收甚重我
朝並無仇怨何可踵行爾部詳察具奏旋聞江西瑞州袁
州浮糧隨奉豁免則是江西億萬年生靈皆
本朝特賜骨而肉之也茲蘇松日待澤於
聖天子準諭減額惟繼因軍興旁午未敢比例上瀆今海
宇盡歸版籍康熙二十三年
大駕東巡賜蠲賜賑二十四年直隸郡邑復免現年錢糧
是

青浦縣志 卷二十九
三
朝廷加意撫綏誠求保赤當此以蘇松浮糧上告

宸聰必蒙矜憫因思兩浙田稅錢氏時畝至三斗宋室者定遣王方贊均稅方贊以爲兩浙旣爲王民豈當復循僞國之法悉令畝出一斗若以松江論之宋時特華亭一縣耳屬浙之嘉興明祖取張士誠時田主佃入租額責成完賦較元九升之科多至四倍雖守令考成纔及六七分竣局然三百年來不能無致痛於洪武也况起科米石止二錢五分折徵而金花銀一兩一錢準科四石四斗三梭布一疋準科二石五斗名浮寔約尚有壓欠纍纍丑年之正供徒糜費於子年之杖比日復一日仍歸豁免公家本不

得百姓之實額而曾不得百姓之感恩掛欠之久民脂民膏仍耗於胥吏之谿壑冊籍之遊移耳今不敢全望減額第願臚陳蘇松情形聞於

聖天子將松江三斗六升五合等起科平米比照本郡之四錢五錢一石折徵田畝加三斗六升五合除本色米外應折若干概引四錢或五錢一石折筭卽是故明初定之額而一轉移間邀

恩已渥至故明初定二錢五分一石之價不敢覬覦也若萬歷以後就事加編量行酌免按萬歷年間松江徵糧田四萬三千七百二十頃九畝零本色米四十六萬二千三

十六石零折色銀四十三萬七千七百三十九兩零康熙
二十三年會計除去坍荒松江徵糧田四萬七百四十四
頃三十五畝零本色米四十四萬二千二百四十石零折
色銀六十七萬二千一百七兩零伏乞一一剴切聲明則
東南民力起死回生也言雖未盡行時論賢之綸著述繁
富有芝石堂文稿不礙雲山樓稿八峯詩稿石樓臆編諸
書行於世

孫琪字襄臣號崑岡縣學生少孤事祖及母皆以孝聞嚴
事兩兄細大必請命而行弟早卒教姪如已子創家祠每
祭莫必聚子弟規誨之歲稔傾貲賑濟邑修文廟捐金厚
助之造橋梁以百計病時猶力建邑西新橋土人取琪字
名之淞泖間稱長者以琪爲首年七十二卒時諸宏謚字
文靜孫學濬字禹功諸士毅字安會朱能一字含光皆邑
廩貢生又陳廷夏字大生陸肇宿字象明居陸家圩陸明
字令融居青龍鎮李世藻字涵初居白鶴江先後以急公
好義爲時所推

陸緯字星聚號煥軒縣學廩生工詩古文彭開祐聯文會
於大雅春藻堂以緯爲翹楚數試不遇葺尋樂山房於余
山西麓居之年六十六而卒著有中吳軼史二十卷陶詩
註三卷煥軒類稿十卷子三晟字臨潭號繭齋康熙五十

三年舉人官宿州教諭次晷字扶桑貢生少秉樞字恪斐
縣學生並以文稱而晷名尤著有蘭齋類稿蘭筍山人集
孫貽穀字鷺傳金山衛學生亦能詩早歿

青浦縣志 卷三十

人物 六

唐士恂字子恪縣學生高祖錦明宏治九年進士歷官刑
部郎中出為江西提學副使士恂清門華胄賦才曷儻雅
慕唐寅之為人自謂解元屢依學使者幕游青陽及越州
最久師事徐乾學而與葉映榴相得晚益貧不遇故其詩
清愴感慨居多今存有嵩少集未刊
任鏞字右洪世居沈巷少長通五經深於詩為婁縣學生
嗣以逋糧案遭斥絕意仕進所居玉雨軒花竹叢密延王
九徵為師招致名人詞客彈琴詠歌以適其志又聞嚴欽

西巖壑奇勝挈舟往訪窮極幽險而返先是鏞誕時母夢老僧以香花前導二力士昇巨鐘置于堂而去故名鏞及康熙三十一年元旦鏞夢老僧以僧伽帽覆其頂至八月病復夢至深山精藍幽絕一僧招之蓋元旦所夢者閱數日向空作禮曰師來矣索筆書云寄生天壤間廓然何所歸縹緲虛無際悠然得所之泊然而逝其來去之迹如此著藏山堂詩詞共十四卷

倪綸字蘭阜縣學生少學于王九徵程化龍喜歌詩三十年積至數千百首有元白風走京師踰躓無所遇故其詩益繁李天馥王日濂定其燕臺遊草刊行于世同時倪暹

字思曼縣貢生亦能詩與王原周綸相倡和著雪軒近稿今佚

邵式誥字鏡臣一字晴巖晚號東圃遊高士奇徐元文之門與陸祖修陶爾穉吳暲唐士恂沈白輩爲吟朋好遊遇名勝地輒欣賞不能去晚年營生壙於祖塋築東圃草堂以爲憇息地卒年七十八有東圃詩鈔行世從孫琰字珉高邑廩生少孤事母以孝聞妻亡不再娶有文名年未三十而歿

王原初名深字仲深一字令詒號學庵晚號西亭居啟聖里父九徵順治十七年歲貢生以學行爲陳子龍所知原

年十二三竊為詩古文父得之喜其不凡年二十四為縣學生康熙二十七年成進士未及用從刑部尚書徐乾學修一統志於包山三十三年選廣東茂名縣廣東徵糧舊責之里長而里長私派於民糧一石派至二三十兩民棄田而逃原令里書編造業戶實名而里長之弊革其業戶棄田遺糧攤諸隣戶逃者歸則并數年之所攤而責之故逃者卒不敢復原代為捐輸遺糧不得攤派隣戶而逃戶之歸者日多南橋有人市父鬻其子夫鬻其妻嚴禁除之其餘設義學禁巫覡鋤強梁雪冤滯頒婚葬之式頌聲大作移署信化三十五年以解犯脫逃解任未幾七獲復官

三十八年補貴州銅仁縣縣故苗地原建學以訓子弟教治葛以為布焙茶榨油以為用谿水湍急教之造船以興販又設保正保副訓練鄉勇以禦苗患設苗寨長貳以約束群苗銅仁大治四十一年行取試授工科給事中時平陽府知府馬思贊請以天下錢糧加一火耗作為正供

聖祖問州縣之為科道者原奏言其不可

上是之議遂革尋以劾文選司郎中陳汝弼姦貪牽連降

級以歸

按王懋竑王式丹行狀丙午榜發中式第六名時主考陳公某得卷歎賞已置第一矣會同考有爭

元者故置第六公選拔同年二人同譜一人皆以縣令行取例科道兼補而三人者欲補科選司陳公持之意未決陳公者公鄉試座師也三人以公同年同譜相好託為之言又於給諫湯公西崖坐上作書致之西崖湯公亦某某

同年也科臣某既入垣卽疏劾陳公以重罪陳公性剛少
合選事或行己意廷臣多疾之事下法司擬大辟
聖祖自南巡歸廉知其事得召見具言科臣挾私陷害以
公手書爲證遂
命內大臣覆審公具言手書始末語與陳公合於是陳公
得免罪三人者皆革職湯公與同席并奪俸六月公亦奪
俸一
年原壯而力學老而不倦早年受業於平湖陸稼書先
生已從睢陽湯斌問學精研理道一以濂洛爲宗年至八
十四卒生平著作繁富詩有短檠北鄉閩海寒筇過嶺潘
州惠陽岫雲銅江鸞臺滄江都蔗南牕諸集經學有學庸
正譌論孟釋義春秋咫聞周易咫聞史志有歷代宗廟圖
考明食貨志譜錄有深廬劄記深廬集訓終制雜說鷄柘
集自著年譜古文共若干卷

孫鉉字思九號雪窻由華亭附生入太學有名春藻大雅
兩社中稍長從汪琬徐乾學宋實穎游性好客一時名士
無不與文酒交常輯

皇清詩選兩集至千有餘家琉球國購得之其國王及臣
以詩寄鉉乞選入集蓋行遠若此孔宅久廢不修康熙四
十四年

聖祖仁皇帝巡幸松江過青浦鉉偕諸生敬請

宸藻表揚得

旨於是外建碑亭中建

御書樓殿閣廊廡煥然鼎新輯志書以志之衍聖公孔某

題授國子監典籍不赴年六十八卒

伍常字又眉弟啟字又東俱縣學生涵賓字又蕤貢生世居崧宅父誠病劇常兄弟相繼割臂肉和藥以進錢德震

王日藻等皆爲文稱其孝行又有樂胥涇

一作落

人張成

志小名勝搽舟爲業父病勝於佛前禱祝割臂肉進之病遂瘳踰二十年始歿勝自父病愈卽長齋每歲遍禮名山若天台天童天竺茅山九華補陀悉徒步往裹糧擔襍梯山航海雖蹈險不顧也家貧塋祖父事繼母如母與弟同居不分財愛弟之子如己出王原常爲之傳又有黃朝鼎者字調元居諸翟里工繪事祖母病篤朝鼎割股作糜以

進病隨愈其創痕圍三寸許旋以瘵卒同時白鶴江人許臘官調字圩人遷黃谿朱佳官亦皆割股療親疾而許時年十有五人尤以爲難又有沈儒字稽中小蒸人父君化怨家誣以大逆吏到門舉家聳怖儒挺身出曰我卽君化也執而訊之顏色不變竟得釋

胡永祚上海籍以選貢除雒南知縣慈祥有幹能康熙三十年大稜流離轉徙道殣相望於城廂及鄉聚煮粥賑饑數月存活者衆時關內旱荒米貴數百里內盡赤地盜漸橫發不可制永祚設法先後捕獲枷示衢路責鄉練看管次日取枷而鄉練等亦恨其刼害逮夜以土囊壓斃之凡

斃二十餘名自是盜竊遂絕境內以安維南稱名宦焉
陶爾穉字穎儒號南村曾祖良恩官四川順慶府知府祖
大受鄉試副榜貢生父龍徵縣學生屢試高等著有問菊
軒集不傳爾穉康熙三十年進士尋選浙江上虞縣知縣
廉明惠愛百姓日爲神宰擢陝西葭州知州以疾乞歸
聖祖南巡聞其名
召見試以文辭稱

旨令扈從還京師入直

內殿月餘以葬親復乞歸歸數年卒爾穉名動一時如殷
譽慶顧圖河蔡書升湯右曾史申義查昇諸人盛相推許
而高士奇尤愛其才招致賓館最久及士奇被謗南還爾
穉方在太學舍其業而從之故士奇尤器重焉

周士彬字介文自號愛蓮居士由縣改府學生幼事繼母
能孝母束緼操作士彬在旁輒記誦四書諸經旣長益研
究宋儒語錄以身體之期於實踐時施維翰爲山東巡撫
招致幕下適裁東省提督標下兵兵變方五月五日燕客
倉卒無以應士彬請發庫數千金以安軍心且奏請給裁
兵半餉俟訓練簡汰老弱卽振驍勇者充之其不堪者令
歸農如是則反側自靖維翰從之事乃定明年維翰晉浙
閩總督士彬以親老辭歸先世家于山所居堂曰山舟闢

山舟之西偏曰寶善堂偕其妻承歡養志及居喪哀痛成疾醫者束手士彬曰莊敬可以日強遂半日靜坐半日讀書由是道益修病亦愈中康熙三十五年鄉試副榜生平視天下無可忽之人亦無可忽之境居常味爽而起靜憇一室揣度時候可以執作始召家衆畢起七旬後雖值冬寒夙興如故蓋曰人不可自甘于昏昧放逸也平日泊然無所好大要以靜敬爲功卒年七十八著文集二卷山舟學詩草十二卷

金世祺字漢翼監生兄歿祺事嫂如母字姪如子至姪婚娶始析產有陝西人客於祺家存銀數百兩期以秋間取

去十六年無信客之子來邑祺祭其狀貌訊其里居知爲客子問父已先卒於途矣祺出銀還之封識猶宛然也子國澄縣學生幼子濬自有傳

張德純字能一號天農別號松南先世居崑山依外家黃氏遷于青浦年二十七舉于鄉康熙三十九年成進士初授內閣中書舍人四十七年改授浙江常山縣知縣常山居水陸衝土瘠民悍號爲難治五十二年秋菑特甚德純蠲賑之外復請發米數千石分置城鄉平糶且許貧者貸食至秋熟還倉五十四年復被重災請米糶借如前賴以存活者甚衆邑賦二萬餘地丁分納丁賦缺則攤之貧戶

德純編審時力除其弊請均丁于地民困以蘇江右閩中之氓春來佃麻縛棚爲居秋則棄去向患滋事編立保甲每棚設長以稽之自是人無犯者官九載以失察旂人解任少工詩有松南詩鈔晚年窮經儀禮周禮皆有箋釋其詩經解頤孔門易緒離騷節解尤殫數年精力而成卒年六十九子之瑱字孟堅以歲貢教習選貴州邕江縣知縣孫鳳儀以保舉歷官至刑部郎中

范超字同叔居黃渡工詩能隸書又精於醫晚藉以自給嘗作秋柳八首最工人呼爲范秋柳徐乾學韓荻皆欣賞之爲人和易洒落招飲輒往酒半吟其所作捋髯發響旁

若無人人亦不以爲忤也後以醉酒暴卒有同叔詩草
張風雍字履中居七滙鎮年十六祖父母父母相繼殂謝風雍與伯兄執喪盡禮而能經紀其家補縣學生名籍甚久之未娶或勸之曰禮未葬不除服兩世骨肉尚在淺土何敢先此與伯兄經營墓地葬而後娶君子以爲知禮族有久不克葬者瘞之有姑喪其夫爲之代輸歲賦又居鄉荒瘠重以役困會大吏清理緜田風雍獨任其費得以蠲減歲稔則竭所餘而賑之年六十有八卒孫宏燧乾隆十五年舉人仕至湖南貴陽州知州

黃朱蒂字奕藻居崧村曾祖廷瑞以孝行稱祖父皆早世

青浦縣志 卷三十
廷瑞撫之至於成立由縣學生以例入貢考授光祿寺典簿康熙三十六年授廣西梧州府通判時南山賊數千人沿途劫掠官兵會勦半載賊愈熾朱芾與梧州協副將深入其穴復以好言撫之群盜聽命地方乃安三十七年署蒼梧縣事三十九年署潯州府奉檄查各州縣錢穀絕不以徇情掩飾巡撫彭鵬深契之四十二年陞鎮安府知府泗州府土司爭村莊歷年不決朱芾往勘夜以銀三千兩餽却之未幾病卒於官所著有崧村詩稿素心集浮舟倡和集先是孫鏗甄選皇清詩選仗助搜採朱芾之力爲多

呂樾字開藩康熙三十八年順天舉人生平喜出遊足跡半天下所至當事禮以爲師故及門多貴顯者大學士高斌其尤著也知陝西盩厔縣事有善政年老乞歸家居二十載吟咏自娛卒年九十一著環谿集藏於家

錢珂字以朝號忍菴本姓陳鞠於外祖故姓錢珂生而穎異過目成誦年十三爲縣學生每試輒冠儕偶康熙四十五年成進士五十四年選山東萊蕪縣知縣禁里長之包納稅糧者懲邪說之惑衆者六十年春隣縣鹽徒肆橫爲首者曰孔振功巡撫李某謂招致其魁則餘黨無能爲因召振功爲材官以圖之而鹽徒亦患無主不相統一揚言

日孔振功若來願就招撫巡撫信之令振功往撫而振功
去不還且部署其黨分爲三十六幫黨二百人共得七千
二百人以徂徠山爲巢穴橫行兗濟兩郡各州縣告急顧
以巡撫意在招撫無敢言緝捕者獨珂以獲賊名報巡撫
驚異因以剿撫兩說密訪於珂珂言鹽徒跳梁內地此易
翦耳若縱之滋蔓咎將誰諉莫若陽爲招撫以安之陰發
勁兵以剿之巡撫聽其言卒擒振功等地方以寧雍正三
年年屆七十乞休旋里與陸緯呂樾潘肇振楊陸榮等以
文酒自娛又三年而卒

諸晉字瞻宸居珠街鎮康熙四十五年進士任河南夏邑
縣知縣勤宣

聖諭修飭學宮清廉自矢懲治豪強奸民歛跡邑有還鄉
書院爲

至聖衣冠墓在東漕村晉修復之以歲時致祭未幾卒于
官囊橐蕭然士民醵貲始得歸其柩中州人祀於名宦云
袁載錫字心友號南樓其先由華亭遷珠街鎮再遷縣城
載錫生而穎異陳麀諸嗣郢皆曰爲神童太倉周肇時官
教諭尤爲延譽丁父憂執喪三年未嘗見齒喪母亦如之
冬日營墓于神山忽大雪風狂舟橫港中莫能牽挽載錫
仰天長號瞬息風定喪舟得以抵岸一時會葬者皆謂誠

孝所感也湯文正斌撫吳取載錫文第一欣賞甚至而河道總督于成龍靳輔亦有國士之知中康熙四十七年舉人四十八年取內閣中書舍人請改教職授江都縣教諭力懲揚州風俗奢汰見諸生必以黜華務實爲言又婚喪侈靡逾分乃作禁約累千言上之學政聽其言令郡邑勒之于石丁祭升歌向用道士載錫募伶舞生使習而充之未幾病卒於官年七十九次子涵雍正四年舉人孫世燾乾隆十七年舉人官廣西北流縣知縣

陸箕永字二水號詩城慶臻第五子縣學生康熙四十二年

聖祖南巡獻九峯賦

召試行在令隨祭酒孫岳頒赴京再試

暢春苑命書大小字以進

賜御書孝經暨衣服筆硯給路費勅歸家讀書應試異數也四十四年復遇

南巡獻廬山賦奉

旨賜監生入直

武英殿食七品俸在翰林院行走纂修佩文韻府

賜第於旃檀寺後四十八年韻府成明年選授四川綿竹縣知縣在任以明惠稱雍正二年擢直隸古北口同知四

年調福建廈門同知署興泉道事年六十四卒著賜書堂
存稿

陸元炳字曙予號心一居沈巷縣學生能詩以高才稱子
江藻字論思號石亭金山衛學生有恆新堂詩稿孫承祖
字武昭號念菴性聰穎少能文乾隆六年舉人七年會試
入明通榜授揚州府寶應縣教諭尋罷終於家弟張淑字
文漪縣學生工繪事長於花鳥

金鼎字澹民號書樵居沈巷沉靜寡默手不釋卷又工草
書耽吟咏著選幽居稿同里王心字載寧號貞一雅與一
時名士交亦喜爲詩有十友廬稿

董洪榜姓胡字育萬號五峯居崧宅幼有神童之稱年十
八補縣學生尚書張照父彙見而異之留與照同學焉康
熙五十一年成進士改庶吉士散館授翰林院檢討六十
年充會試同考官舊例會試閱卷迴避本省時總裁遂寧
張鵬翮以二場論罕當意者命洪閱遺卷得宜與儲大文
置之第一榜發以違例降級調用左遷國子監助教已而
量移行人司司副旋陞行人行人爲京僚間曹居是官者
經月不入署洪聚同僚焚香煮茗手執周易老子疑義相
析聞者感嘆折服不知日之將暮也雍正七年充順天鄉
試同考官明年丁父憂服闋補原官乾隆三年京察一等

六年陞刑部河南司員外郎冬十二月充律呂正義館分
修官明年病卒子椿字賡雲號雲嶠監生由四庫館議敘
署陝西盩厔縣丞未幾病歿以工畫山水名於時

張梁字大木號幻花婁縣人康熙五十二年進士當選行
人會行人司裁須別補遂歸松江絕意仕進以郡城酬應
繁乃卜居珠街鎮有保閑堂澹吟樓學圃居諸勝兄彙別
業在杭州西谿梅竹最深之處春初輒攜小艇探梅至雜
花俱謝綠陰如幄乃歸過中秋復往看秋山紅葉歲以爲
常工琴遇好山水及花月佳時一彈再鼓馴鶴爲之起舞
世以擬柴桑之處士松陵之散人時姪照爲刑部尚書方

貴盛或勸之出山顯要可致笑而不答也晚歲專修淨土
年至八十三卒有澹吟樓詩詞鈔大致宗法王孟韋柳間
效山谷誠齋以見新異云

吳周紘字元服府學生事母至孝與人言必以信家貧館
於鄉去家三四里主人有盛饌輒懷一二嚮走歸奉母主
人廉知之每食必具乾脯焉其後從學者衆遷居邑城妻
陳氏有賢德壯歲不育屢爲置媵然卒無子卒年九十九
門人私謚曰貞孝先生

周鵬翔字遂飛幼時母患目疾將瞽鵬翔以舌舐之遂得
復朗父病夜不假寐躬爲滌腠嘗糞踰半年父歿哀毀盡

禮母病割股以療康熙五十二年知縣洪亮采欲請旌鵬
翔固辭卒年六十八子勝猷字又新乾字又襄俱府學生
乾以拔貢官陝西石泉縣知縣

張澤城字虛受又字實甫以誠會孫沉静寡默篤于孝友
弱冠入京師吳郡何焯太倉王揆咸以國士目之康熙五
十九年舉順天鄉試雍正十二年

詔舉博學鴻詞有司將舉澤城送巡撫考試澤城曰吾老
矣焉能握管向人求試耶不赴詩文之外兼工書法僉謂
畫禪室遺範也八十一歲卒

邵成楨字樹百號植庭晚號椽軒麟子成楨幼有神童之

目康熙六十年成進士授廣東開建知縣縣界連廣西徭
獞曠賊出掠爲民害成楨督捕嚴密獲者杖斃害遂止有
盜案三十餘人前令已結成楨閱案廣廉其中有冤抑者
親自訪訊得無辜者釋之人呼爲邵青天逾年調繁徐聞
徐聞地廣民貧多逋欠下車後首務力田荒廢者墾辟之
欠課遂完富家有張姓者通隣婦梁氏致死其夫成楨將
按律定擬張屬人餽銀五千兩成楨叱去之府亦屢駁成
楨執不從竟置大辟闔邑稱快又修葺學宮剏建義學文
風日起尋以病乞歸成楨學問淹博賦才華麗用以爲詩
多多益善出入於唐之中晚以及劍南石湖松郡之稱詩

者一時未之或先也

李士元字一齋金山衛學生系出元木華黎之後有咬兒者鎮撫松江沒墓于郡城其後遂改姓李居廣富林能詩有一齋焚草

周吉士字霽公號漁山思兼七世孫世居周家草周氏世著清素至是益貧授經奉母刻苦讀書并課其兩弟雍正二年成進士改庶吉士

世宗憲皇帝欽恤岸獄選庶常中廉察者爲部曹遂授主事陞廣西司員外郎廣東司郎中其在刑部提牢也嚴查獄卒毋虐罪囚躬給衣糧周視萃梏爲省其疾苦冬月披

敝羊裘一隸攜燈夜巡行圍土中曉鐘動始返冰索索然滿身也性仁恕所讞爰書當於法而止凡閱揭帖有疑者必言於尚書或不從執之甚堅語其僚曰迂戇吾自知之吾守三尺而已尋以養親請假旣歸饋粥不繼處之晏如未嘗一入公府海上富人有喪者持銀五百兩請往弔之時冬盡大雨雪窘甚或勸其行吉士不應有頃迺曉家人曰吾豈不知留金可佐衣食然吾守先人遺訓久矣誓不以不義辱先人也年六十卒有南堂學詩草

王丕烈字述文號東麓雍正五年成進士改庶吉士授編修充一統志纂修遷御史巡視通州漕務十一年充會試

同考官陞吏科給事中兩任廣韶學政整飭文體生童中能誦五經者錄高等予入泮士子益研精於經籍福建巡撫莊有恭尤所賞識者也試竣補授福建興泉永道乾隆六年擢授福建按察使時詔安民聚黨煽動及漳浦戕殺縣令丕烈至不及一月盡獲渠魁又慮愚民罔知法紀照依律例開載某事應擬某罪繪圖曉示使知儆戒閩地多高原雨澤愆期窮民乏食緣以不法丕烈爲立補種雜糧及通融平糶之法奏請明科條以振厲末俗廣教化以興起淳風得

旨允行七年調河南按察使禁重刑嚴固戶開築溝渠堤堰又酌定小鹽禁例以裨窮黎民胥賴之十年以丁內艱回籍十四年卒於家著有春暉堂集長子芳乾隆九年舉人任荆谿縣訓導

葉承字子敬號松亭能書畫以曹一士顧成天爲師雍正五年成進士八年授浙江常山知縣常山四境皆山爭經界者無虛日且多盜又當江西閩廣孔道疲于迎送承不憚勞瘁事皆辦治總督李衛者見其短視謂于臨民非宜奏改教職補安徽貴池縣教諭未幾罷歸家居教授年七十九而終子抱崧以詩賦才名著早卒

曹一士字諤廷號濟寰負異稟於書無所不窺爲名諸生

三十餘年雍正四年舉於鄉選授江蘇如臯縣教諭八年成進士選庶吉士改編修十三年擢御史未幾轉工科給事中慷慨敢論事言開墾有名無實十年成賦之後州縣不敢懸欠督撫不敢開除將爲民患又言奸人挾仇告訐指摘詩文字句誣爲大逆株連羅織宜悉禁絕又言兩浙之場課宜捐帶徵之漕米宜免又言督撫保舉專用能員大抵趨走便利應對捷給之徒而惻怛愛人與民休息則謂之無能每致廢斥非務本尚實之意請勅督撫以敦吏治頗見

嘉納施行尋卒于官年五十九平生文章名海內壬子充

順天同考官時稱得人著四焉齋集子江寧司訓錫端等梓以行世

胡寶琮初名金蘭字泰舒號飴齋祖希烈以貢生歷官常州府教授始自歛遷於婁縣寶琮資稟異人雍正元年舉于鄉乾隆二年試授內閣中書大學士鄂爾泰選直軍機處六年秋大學士查郎阿兵部侍郎阿里衮奉

命相度奉天三省地形請以同行時適隨

駕校獵卽由木蘭通歷諸部至盛京過吉林渡松花江轉至黑龍江再轉至寧古塔又徧閱諸邊及春而還共行二萬二千餘里橫穿側出于冰霜風雪中覽其形勝辨其土

宜自以為極域外之大觀也會舉御史查郎阿疏名以上
御試第一時已遷內閣侍讀旋授福建道監察御史轉戶
科給事中再遷順天府府丞十三年

王師剿金川

命大學士傅恒經略寶琮從行日馳三百餘里恪遵

廟算剋期告捷寶琮贊畫居多擢順天府府尹屢遷宗人
府府丞副都御史十六年隨

駕南巡有偃師奸民傅毓俊以私憾控張某謀逆逮繫百
餘人

命公往鞠乘傳七日而至集案牘視之比夜分日吾已得

其實矣一訊而伏止誅毓俊一人餘皆省釋中州人以為
神明尋遷兵部右侍郎兼府尹如故遂授山西巡撫旋調
湖南自湖南而江西而河南再撫江西復至河南凡四省
六任焉在山西撫饑民理冤獄抉貪吏除奸豪整關隘力
行教養之政在湖南民貧俗敝苗徭困兵役之擾悉整飭
之其在江西設編船嚴保甲以息鄱陽之盜奏罷廣信開
山之議重封禁山以杜後患江淞歲饑江西亦中熟市僧
居竒廼宣禁以通商販鄰省賴焉二十二年撫河南開陳
汝許與河北之彰衛懷同時被水者六十餘州縣

天子軫念災黎發帑金數百萬撥米數十萬石以賑之寶

青浦縣志 卷三十一
六
璆率屬吏計口而賑不遺一人葺廬舍招流亡借牛種至冬隨地留養所全活以數千萬計復奉

命開濬水道工賑兼舉民飽食趨事所開幹支各河凡六十有七道計二千五百餘里皆因自然之勢層注而下分入於江南之濉淝諸水會于淮以歸洪澤湖迺會其源流記其深廣爲圖說以獻請

御製碑文以垂永久

上深嘉之加太子少傅自是凍歲大稔二十五年十二月復移江西次年七月河決楊橋沁洛丹衛同時並漲被水者又五十餘州縣

命大學士劉統勲戶部尚書兆惠及戶部侍郎裘曰修南河總督高斌共治之復

召寶璆撫河南時決口數百丈未合將開引河築壩束水需藁薪之屬數千百萬日役數萬人以次徵發皆與之直民不知擾被災之地周恤備至無一流亡者水落田出民借種以播菽麥次年秋皆復大熟寶璆在河南最久習知其地利民俗盡心經畫故民樂而安之二十八年正月卒于官事聞贈太子太保兵部尚書諡恪靖

賜祭葬如例且

允所請入籍青浦

杜昌丁字望之號蔗林明兵部員外郎麟徵之孫也父登春山西廣昌縣知縣縣有丁糧舊例五年一查應除者不除緣以爲利登春盡除之尋遷浙江處州府同知以卒登春年五十九始得子大學士陳廷敬聞之寓書曰爲廣昌除千丁乃爲杜氏增一丁耶命名昌丁可也遂以名之昌丁少有文譽客雲貴總督蔣陳錫幕時征西藏陳錫誤餉奉嚴

旨令督運赴藏以贖罪賓朋盡散昌丁獨與陳錫行往返經年人稱其氣誼中雍正四年順天副榜七年以保舉選福建浦城縣知縣革無名科歛勤于課士優禮賢者報最擢永春州知州築衛城壩初書院學舍會泉州有施氏者拒捕大吏議屠勦昌丁力諫總督命署府事乃單騎往諭誅首惡全活者千餘民德之在永春二十七年病卒貧不能歸州民購之且立祠於壩以祀焉

陳源發字岷山一字西淵縣學生雍正六年拔貢

廷試列一等考教習復拔第一教習期滿選授黟縣教諭在任七年黜浮華崇實行士風一變丁艱歸服闋授蒙城縣教諭尋以疾終官署年八十有一

葉本字敷南係歲貢生承謨子雍正七年以監生爲禮部尚書任蘭枝薦舉發往河工委用大學士嵇曾筠委築高

堰大工敘功一等以沿河州縣補用初署當塗旣授盱眙時泗盱六滁諸州鹽徒私販中有貧民爲其所誘者本奉檄細鞫開釋甚衆更爲盱邑文廟改新又於玻璃泉建書院文風漸盛大啟科名乾隆二年陞泗州知州勘賑水災積勞成疾總督尹繼善以聞奉

旨陞鳳陽府知府旋調河南衛輝府皆以廉能稱後以失察屬員虧空解任未幾降爲江南淮安府山安河務同知二載丁外艱歸值歲祲施粥平糶收育遺孩鄉黨頌之將服闋以疾卒于家年五十四

陳麟詩字穎傳居珠行鎮兄蔣麟字雲稼縣學生能詩賦

麟詩爲諸生每試輒冠其偶是時給事中曹一士未第聲望相等適鄭任鑰來爲學政負知人之鑒比試麟詩第二一士第八一士頗不自得任鑰曰若等所業不相上下今殿最蓋偶然耳然曹生不久當達陳生恐以諸生終後果如其言以歲貢生當得訓導亦不能待也麟詩爲文明秀圓潤間取題之癥結肯綮用十餘語抉剔而縷分之灑然劃然能警動人耳目以是試輒利爲人閒靜晚年益務爲和厚偕人語煦煦然未嘗有愠怒之意寡應酬經歲不出門講學稍暇輒取少時所習時文排次溫繹終則復始日以爲常卒年七十八與麟詩同時爲老師宿儒者有雷長

發字宸修陸大光字中黃胡黃道字序東張宗昊字果修
孫俊徵字啟南張璠字魯如沈懋功字枚臣咸以工詩文
能教學名而麟詩尤著子梧岡縣學生

陸榮柘字錫山號香林振芳孫華亭縣監生編修高輿以
學行奏

聞與纂駢字類編書成丁父憂辭議敘而歸乾隆元年副
都御史陳世倌疏薦博學鴻詞不赴生平著作有香林詩
文集弟榮程字淳川號思可康熙五十二年舉人才思超
邁少與榮柘齊名時復有二陸之目銳于讀書百家衆流
之學多手自抄錄者長子文啟字宇東縣學生能詩工小

篆及分書年六十卒第四子文蔚字靄卿縣廩生工於詩
詞後以事失意而卒第七子惇宗自有傳

胡鳴玉字廷佩號吟鷗歲貢生工詩賦學政課試輒置前
列雍正十二年

詔舉博學鴻詞巡撫高其倬學政張廷璐薦之乾隆元年
召試以疝疾發報罷既歸弟子日進尚書長洲沈德潛集
唐人詩句贈之云漢南詩老猶存社魯國諸生半在門年
八十三終著有訂訛雜錄行世

金濬字鈍餘號東銘乾隆三年舉于鄉十四年中會試明
通榜選建德縣教諭未幾以事被議歸覃心詩古文而古

文尤深造以清峭簡潔爲宗

趙頤字百期號蠖菴生而穎異至性過人五歲遭祖母喪能成禮年十三以背誦十三經受知于學政鄭任鑰爲縣學生張宗伯廷璐視學江蘇時有國士之目乾隆十年成進士以知縣用分發江西署上高縣事上高俗素強悍頤繩以法境內肅然逾年授袁州分宜縣知縣判決如流暇日延諸生講道勸學巡撫宴斯盛稱爲愛民如子愛才如命焉居二載以事去職卒年四十有六民德之祀于袁州名宦

沈湖字鏡涵號涵虛居小蒸乾隆十三年進士湖工於時

藝所評選爲童蒙兔園冊子廣西巡撫李錫秦聘主秀峰書院時戶部郎中許道基爲學政深契之後選潁州教授勗諸生敦倫修行文宗先正士多遵焉致仕歸卒年七十七

潘肇振字文起一字毅遠衷昉從孫先是世父恪如字孩士懿字愷容皆以文學著於時肇振少爲縣學生承其家學耽書嗜古內行純篤年五十以家事付二子每日垂簾靜坐丹鉛校勘紛如也屢躡場屋以諸生終胸中不能釋然嗜酒長吟吐其抑塞磊落遇俗人尤掉頭不與語人故以狂目之今存遺安稿二卷

徐恕字心如號芳圃父葵縣學生居白鶴江恕生一歲母
亡葵撫之教以讀書五歲能識字乾隆十年年十六補縣
學生十六年成進士選浙江浦江縣知縣尋補海寧調平
陽自壬申癸酉丙子巳卯四入文闈所拔悉兩浙知名士
士論翕然稱之秩滿擢太常寺博士旋遷宗人府主事充
玉牒館纂修三十年典試河南三十二年典試廣西遷吏
部稽勲司員外郎尋授湖州府知府兩月調杭州三十五
年春以卓異進浙江糧道蕭山被水親臨查勘動帑發賑
窮黎賴以全活收埋浮棺數千立爲義冢並置田以供歲
祭三十七年轉浙江鹽道三十九年授浙江按察使六月
有飛蝗自海外入錢塘境恕馳至海濱教民夫以掘溝捕
掩之法能捕獲者計升斗易以錢米凡兩晝夜蝗悉淨境
內以安四十一年丁內艱四十二年

命署山東布政使值歲旱恕布衣草屨自泰安西門外步
登泰山巔禱畢雲合俄而甘雨如注自昏達旦百姓遮道
懼呼遠縣馳報者皆云同日得雨枯槁勃生歲以大熟七
月調署浙江布政使四十四年正月仍授山東布政使十
二月十七日夜署中火發入內取印焦灼而卒事聞
上憫之贈副都御史廕一子

陸惇宗字望之號蒲塘本姓林榮程之子性聰敏藝術皆

其懸解故工楷隸而於地理尤精中乾隆十八年副榜補
覺羅官學教習二十一年舉順天鄉試教習期滿選福建
平和縣知縣平和當閩省極邊俗喜械鬪他若創墳強搶
等事靡日不有惇宗寬猛並用撫循整飭期年俗漸革邑
境諸營碁布兵民雜處驕卒頗有爲民患者而將弁又袒
護之日益縱惇宗過瑄谿獲兵之聚賭者方訊問同伍卒
突入刦之以去惇宗奏記上官拘其黨各置於法兵弁肅
然尋調閩縣有未經審報命案家人以行期迫欲交後任
惇宗曰遲一日待質人受苦一日且我任內事不可不結
遂於一日內審斷錄報乃去及抵閩縣米貴民情沟洫惇

宗請平糶散米二萬餘石民賴以安各府州重案未成讞
者一以委惇宗秉燭聽斷每至深夜按察使以是賢之知
府嘗猝至直入臥室四壁蕭然因謂曰官舍竟同僧舍耶
歎息而去總督巡撫皆以卓異薦陞有日矣以母老請乞
養旣歸里事母盡養不以竿牘干當事知縣楊卓請修縣
志分纂水利田賦職官科目諸門考古援今同人稱其精
密四十九年二月遭母艱至七月以哀毀病卒

沈海字百川乾隆二十一年舉人專精制義以果銳廉悍
爲主爲諸生常冠其儕偶屢上春官不第四十八年分發
浙江以知縣試用未及用而卒其兄江字濬川亦以能文

名同時顧岳字書巖事親孝多習舊事知縣楊卓修縣志屬以分纂搜羅考證甚爲詳晰


朱位行字因在號素堂由廩生選拔乾隆癸酉科貢生性行貞潔學問深醇屢試冠其曹與嘉定朱岡西趙南塘受業于金壇王己山先生文章有宗派造門問業者日衆惜屢薦未售著有詩文稿刊刻行世人僉奉爲楷式

徐薌坡字蒼林號澤農居菱蕩灣縣廩生能文尤工於詩詞江左諸宿老皆與倡和每逢秋賦嘉定朱岡西開文醮於秦淮必招入焉乾隆三十年春南巡召試入二等

命在武英殿纂書處行走是年選拔貢生既

廷試輦下並重其名然屢試北闈不得志時周震榮任永清知縣羅致幕下又屬主清暉瑞林兩書院居數年復入京師病瘵卒

顧天桂字正鍾父志耿府學生天桂性孝後以例當得主簿時志耿已八十餘恐不能迎養遂不赴選乾隆三十九年志耿病篤天桂日侍湯藥踰月不解帶逮歿哀毀骨立不一年竟卒天桂篤友愛敦任卹道路橋梁多所修整又嘗煮粥賑饑里人至今稱之



青浦縣志

卷三十一

藝術

劉歆奏六藝略指六經言之然周禮六藝謂禮樂射御書數其非專主于經明矣唐書又分說經者為儒學工詩文者為文藝其說未當也書畫家為書之類今以列于藝術而醫卜雜占則方術方技之屬也併附見焉

元

吳鍾山失名家鍾賈山遂以自號善太乙九宮諸算術自言其學得之祖一峰傳於父竹所秘不輕語人揚維禎訪

之鍾山曰先生棄官已十年數盈十必變未有往而不復者截自四十九年而往爲下箸曰某年起某官某年移某所某年當調內某年當致事去後皆如其言

章瑾字公瑾號采芝青龍章氏後晚居李墟博學好古能詩善草書勁健骨立自成一家尤長於畫得馬遠夏珪筆法嘗寫寒山拾得像春江送別圖皆不愧古人手垂至膝幅巾鶴氅登山臨水笑談絕俗人以遺民目之同里吳子陵工山水亦有聲

明

相子先字人傑浙人僑居七寶鎮滑稽多智尤精于奕洪武中召至京燕王與對奕嘉之賜有龍鳳弈具

周宣字彥通號秋齋宏治進士官廣東左轄能詩文書法端勁有體格識者重之

周紹元字希安善八分書亦工篆刻

方鈞字範斯幼孤力學山水摹倪黃尤工墨竹秀勁有力同時有袁源者字湘亭亦以竹名

陸萬里字君來舉人萬言之兄善書時莫是龍早逝而董其昌後起故萬里獨步一時

王畧字禹功山水法董巨子雋字禮石宗黃子久尤有名又龔雲鵬字扶搖號二癡道人山水師曹雲西門人施予

厚字貽久號樵峰臨摹宋元諸名家往往神似其後有顧
吳穎字聖林歲貢生黃石字彙萬俱工山水而石尤得二
米高房山筆意又有陸張淑字文漪縣學生陸崇字書常
所畫禽魚花鳥神韻亦極生動

張昉字元昉號友蓮食貧狷介著述自娛善畫山水法元
四家性不喜從貴人遊時知縣屠隆慕之思見其人先索
畫長卷以金為壽昉却之卒不往見

葉有年字君山由上海遷居縣城山水師董巨叅以米法
足跡半天下得山川之助所造愈工董其昌陳繼儒俱重
之肅王聞其名常聘至秦及歸四方爭購其畫無虛日卒

年八十葬余山

本朝

蔡天槎字羽明倫之孫習醫為太醫院孔目又工篆書吳
偉業贈以詩云一經傳漢相八法繼秦碑知縣魏球舉為
鄉飲大賓弟眩字賓升工於畫球修縣志其圖皆屬賓升
繪之子簡宣各以文學世其傳

陳尹字莘野號雲樵少從學於上海李藩所畫人物山水
花鳥初甚工細後入疎老有青出於藍之目王原嘗評其
畫云前無十洲後無章侯可入神品得其傳者蒲穀陳炳
金曜穀字敬存工山水寫花鳥如生其子璧字敬仲亦能

寫生炳字星若寫神像最佳曜字朗西工金碧山水秀麗
別成一家

葉洮一作陶字金城有年之子能世其畫學康熙中供奉

丙廷

詔作 暢春苑圖稱

旨奉

命監造以病乞歸

賜金乘傳時人榮之尋

復召得疾卒於途

陳曰允字灑甫青龍鎮人得嘉定郁士魁瘍醫之傳善刀

鍼能治危症子天士字御珍亦精其業

宋紹景縣學生精于六壬有神驗與醫士凌某素好一日
凌將去紹景曰若明春來我不及見也然須一過我家明
年凌至紹景沒已三月餘矣唁其家人卽出一函授凌上
署某月某日凌某開看云係未病時所留者與唁之時候
相符不爽其神驗類如此

汪日賓字秩東號靜然邑監生善畫蘭秀逸蒼古能以已
意運前人法揚州鄭燮以蘭自負每謂雲間有靜然我輩
當焚筆硯

顧琳本姓沈字吉山縣學生琳之祖漁濱能詩常詠秋柳

有繚繞棲鳥啼夜月淒涼寒笛咽江船句為世所稱琳少
喜繪事所畫山水以石谷為師年八十餘卒同時有鄭基
成字大集縣學生以破墨作花鳥蕭疎有致宛乎徐天池
之遺也

流寓

雲間之勝以九峯名而青邑獨得其五泖澱環之縈
青繚白嵐氣湖煙相為吞吐谿山幽麗好事者爭托
焉宋元兵燹之交士大夫避地僑居寄煙霞而搜泉
石流風餘韻所謂地以人重也嗣後畫師詞客奇人
逸士笠屐往來鄉里稱為嘉話今掇其尤著者錄之
俾後人知所考云

漢

笮融丹陽人初在臨淮曹操以兵來討融入廣陵郡境太
守趙昱拒戰為其所殺已而徐州牧陶謙使督廣陵漕運

言海縣志 卷三十一 五
搽攻謙融護謙男女百口馬三十匹走北亭鄉避難及卒
遂葬焉

宋

梅堯臣字聖俞宛陵人工詩初以蔭官桐城主簿調河南
歷德興建德襄城縣令監稅湖州以大臣薦召試賜進士
出身爲國子監直講累遷尚書都官員外郎預修唐書學
士梅詢聖俞叔也詢知蘇州聖俞往來青龍鎮著有青龍
雜志

郊亶字正夫崑山人嘉祐二年進士初授睦州團練推官
知於潛縣熙寧三年自廣東安撫司機宜文字上蘇州水

利書言淞江之南大盈梁紇趙屯等浦二十八條淞江北
夏駕等浦二十七條久不修治每遇大水上頂塘浦之岸
並沈在水底不能固田議者不知此塘浦元有大岸以固
田畝乃謂古人浚此大浦只欲泄水此不知治田之本也
詳見水利朝廷得其書以爲可行授司農寺丞提舉興修水利
亶至蘇興役凡六郡三十四縣比戶調夫民以爲擾呂惠
卿言其措置乖方遂罷役亶歸治所居之西曰大泗澗者
如所陳之說爲圩岸溝澮塲圃歲入甚厚圖狀以獻且以
明前法非苟然者復爲司農寺主簿遷丞修本寺制式頗
號完密除江東轉運判官元祐初入爲大府丞其別業在

青龍鎮故有邾家橋今又名邾店云

杜可久平章杜衍之後爲青龍直學因家于西霞浦有文行立日課以訓迪諸生勤敏不倦士樂友之

何滄汴人建炎初爲京西北路制置使隨高宗南渡見秀州青龍鎮土風淳厚遂卜居焉滄爲人勁直有才氣清約不滓當時稱爲廉吏長子深授省幹次子澄仕左宣議郎簽判復營室於青龍江西市上

王垂裕宿遷人太學生高宗南渡隨至建康及定都臨安遂卜居於青龍紹興間秦檜主和議稱臣納幣率同列上書切諫檜大怒削籍爲民孝宗立銳志復讐復上書上採

其言擢爲錢塘教授嚴立學規士風丕變入爲正言時湯

思退當國復主和議垂裕劾其奸邪誤國斥爲

縣丞

廉能有惠政士民爲立祠後告歸長子大業慷慨尚義修文廟出粟賑飢者大吏嘉其義特疏旌獎

俞道善汝尚之後宋季避兵華亭喜九峯娟秀卜居鳳凰山戒子孫曰宋室將傾吾輩但當力耕勿干仕進也深衣髮冠談說道義常銘漢瓦硯云人本漢人土亦漢人與土皆古以寄其意焉

吳惟信字仲孚雪川人居華亭白鶴邨詩名籍甚吳中有糜先生者老儒也記聞該洽惟信遇之誦所作傷春絕句

糜下拜曰子謫仙人老夫雖欲效顰無可置喙矣與施樞
友善投贈最多所存菊潭詩集清潤蕭散較樞在侪儔間
邵桂子字德芳號元同淳安人咸淳進士授處州教授後
不復仕娶華亭曹澤之女因家小蒸年八十二卒歸葬淳
安子祖義池州學錄能詩工篆隸孫亨貞自有傳

殷澄字公原華亭胥浦人父某宋節幹官家富好施每大
雨雪必載薪米徧乞寒餒人死者爲之棺殮人目爲殷佛
子元兵入華亭澄避地南錢南錢猶保聚未肯下將軍號
楊掃地者怒命屠之澄往叩軍門曰郡縣新附將軍不撫
綏招徠以稱神武不殺之德顧欲毒勦斯民乎楊怒手劍

叱之澄正色曰殺我一人活千萬人我死猶生也語益烈
楊感悟而止於時全活者以萬計丞相伯顏聞而義之授
華亭軍民都總管澄棄去曰宋亡我以親不死獨不能逸
乎遂野服隱居浦上時放浪九峯三泖間慕其人者目爲

柳南浪翁云

元

趙孟頫字子昂宋秦王德芳後世居浙江湖州年十四以
父蔭補官宋亡家居侍御史程鉅夫奉詔搜訪遺逸以孟
頫入見元世祖欲大用之議者不可授兵部郎中遷集賢
直學士歷江浙等處儒學提舉延祐中累拜翰林學士承

旨得請歸至治初卒年六十九追封魏國公謚文敏孟頫
風流儒雅爲有元一代冠冕嘗得古琴二一日大雅一日
松雪因以大雅名堂而自號松雪道人有松雪齋集書法
臻二王妙處尤入北海之室寫山水竹石花鳥及馬取法
晉唐悉造其微配管氏生小蒸孟頫常往來其地故壽寧
橋有松雪讀書臺焉管氏別有傳

劉世賢字希孟山東東光人宋丞相摯之後寓居小蒸善
琴爲人端重與曹知白善至正十三年卒於小蒸子孫遂
家焉四世孫鴻好古尚文兼善琴理並受徵聘

火魯忽達漢名魯得之西域康里人平章冀國公保八子
也性重厚安貧好學弱冠爲館甥於小蒸曹氏遂居焉中
至元元年鄉試以父廕授晉寧治中改監長興州秩滿仍
歸小蒸歷遷利用監大卿以卒子企賢生於小蒸由直省
舍人仕至吏部尚書

楊維禎字廉夫浙江山陰人母李夢月中金錢墮懷而生
維禎少時日記數千言父宏築樓鐵崖山中繞樓植梅百
株聚書數萬卷去其梯俾誦讀樓上者五年因自號鐵崖
泰定四年成進士署天台令改錢清場鹽司令猶直忤物
十年不調會修遼金宋三史成維禎著正統辯千餘言總
裁官歐陽元功曰百年後公論定於此矣將薦之不果轉

建德路總管府推官擢江西儒學提舉未上會兵亂避地
富春山徙錢塘張士誠累招之不赴遣其弟士信咨訪之
因撰五論具書復士誠反覆告以順逆成敗之說士誠不
能用也又忤達識丞相徙居吳淞江府志維楨以上書忤丞相帖木兒因携家
華亭與海內薦紳大夫與東南才俊之士造門納履無虛
日酒酣以往筆墨橫飛或戴華陽巾披羽衣坐船屋中吹
鐵笛作梅花弄或呼侍兒歌白雪之辭自倚鳳琴和之賓
客皆踴躍起舞以爲神仙中人洪武二年太祖召諸儒纂
禮樂書以維楨前朝老文學遣翰林詹同奉幣詣門維楨
謝曰豈有老婦將就木而再理嫁者耶明年復遣有司敦

促賦老客婦誦一章進御曰皇帝竭吾之能不強吾所不
能則可否則有蹈海死耳帝許之賜安車詣闕廷留百有
十日所纂敘例畧定卽乞骸骨帝成其志仍給安車還山
史館胄監之士祖帳西門外宋濂贈之詩曰不受君王五
色詔白衣宣至白衣還蓋高之也抵家卒年七十五

黃公望字子久號一峯道人又號大癡莆田人博學多才
尤善於畫初師董源巨然後稍變自成一家所著寫山水
訣至今宗之始寓松江之柳家巷繼與曹知白交留小蒸
最久意態忽忽每獨往泖中通海處看激流轟浪雖風雨
驟至水怪騰擲不顧也嘗畫由拳讀書圖爲時所稱後歸

富春年八十一卒

倪瓚字元鎮無錫人也家雄於貲工詩善書畫四方名士日敏其門所居有閣曰清閤幽迥絕塵藏書數千卷皆手自勘定古鼎法書名琴竒畫陳列左右四時卉木縈繞其外高木修篁蔚然深秀故自號雲林居士時與客觴咏其中爲人有潔癖俗客造廬比去必洗滌其處求縑素者踵至瓚亦時應之至正初海內無事忽散其貲給與親故人咸怪之未幾兵興富家悉被禍而瓚扁舟箬笠往來震澤三泖間獨不罹患張士誠累欲致之逃漁舟以免其弟士信以幣乞畫瓚又斥去士信恚他日遊湖上聞異香出葭

葦間疑爲瓚也物色漁舟中果得之杖幾斃終無一言及吳平瓚年老矣黃冠野服混迹編氓至松江寓曹知白家最久洪武七年卒年七十四

蔡訓字君立江陰人元季兵起避地松江隱於漢成里爲人有智機故遇亂而不及於難與孫作出處相依築東郊草堂以耕讀老作爲之記人稱曰東郊先生

陶宗儀字九成浙江黃巖人父煜元福建江西行樞密院都事宗儀少試有司一不中卽棄去務古學無所不窺出游浙東西師事張翥李孝光杜本爲詩文咸有程度猶刻志字學習舅氏趙雍篆法浙帥秦不華南臺御史丑驢舉

爲行人又辟爲教官皆不就張士誠據吳署爲軍咨亦不起
起洪武四年詔徵天下儒士六年命有司舉人才皆及宗
儀引疾不赴晚歲有司聘爲教官非其志也二十九年率
諸生赴禮部試讀大誥賜鈔歸久之卒宗儀遷於松江始
居泗涇繼愛鳳凰山之勝門弟子爲築室以居之又葺說
郭書史會要四書備遺並傳於世

謝應芳字子蘭毘陵人耿介尚節義至正初江浙行省舉
三衢清獻書院院長兵亂南遷居吳之葑門轉婁江渡吳
淞築室篠涇來往青龍白鶴間平生博雅好古爲文章咸
有根柢洪武初年踰八十始歸老其鄉之橫山自號龜巢

老人所著有思賢錄辨惑編詩有龜巢摘稿豐城余銓范
陽盧熊序之次子林字瓊樹洪武十年以郡縣舉至京師
授開封新鄭縣教諭

李升字紫篔濠梁人晚年移家澱湖築草堂居焉有白雲
窻楊維禎賦詩贈之善寫竹石尤工平遠山水識者謂其
源出王維許恕嘗題畫竹云曾向淮南識李升黃巖書法
尚縱橫只今葉葉秋聲裏烟雨蕭條空復情蓋能畫亦能
書也

錢應庚字南金幼喪父弱冠贅居泖上已而以明經教授
嘉禾至正十六年浙右兵亂扁舟載妻子還泖濱門人小

蒸曹炳闢室館之名曰一枝安又常館於澱湖謝氏應庚
工詩與邵亨貞同里開以文字交者三十年亨貞極推挹
之兄抱素字素庵亦工於詞

王逢字原吉江陰人自號席帽山人人才氣俊爽少學詩於
延陵陳漢卿漢卿故虞集弟子因得其傳行省及憲臣交
薦之皆不就初避地於無錫之梁鴻山未幾游吳中築室
青龍江上逢祖母徐氏嘗植雙梧於故里逢追思之因名
所居曰梧谿精舍著有梧谿集後又徙上海之烏徑築草
堂以居年七十卒鄱陽周伯琦謂爲張志和陸龜蒙之亞
楊乘字文載山東濟南人少負氣博涉經史由叅議府掾

累官監察御史遷浙江省員外郎尋以杭州陷非罪被黜
依章元澤以居元亡或傳大府將起之乘曰吾豈事二姓
者使果至乘自知不免乃辭元澤曰某行矣敢以家累君
元澤曰友責當爾也旣而誨二子由卓事君立身之道乃
就寢久之由卓入視則自縊死矣案上得遺訓云死生如
晝必有夜何足介懷吾老矣獲全臣節死固甘心其以麻
衣草屨歛歲時祭止蔬食此蓋晚年至願由卓益宜修省
勿貽人誚也元澤薨之尋行臺昭雪其前後事由蔭山東
宣慰司都事卓清忠書院院長

明

孫作字大雅江陰人爲文醇正典雅動有據依嘗著書十二篇號東家子宋濂爲作東家子傳元季挈家避兵於吳蓋棄他物獨載書兩簾土誠廩祿之旋以母病謝去客吳淞江上衆爲買田築室居焉洪武六年聘修大明日歷授翰林院編修乞改太平府教授召爲國子助教尋分教中都踰年還國學擢授司業歸卒於家

陶振字子昌號癯叟浙江嘉興之陶莊人自號釣鰲生元季徙吳江又徙金澤學於楊維禎兼治詩書春秋三經洪武二十三年舉明經授吳江縣訓導後撰紫金山金水河二賦以進太祖命撰飛龍在天賦稱旨陞湖廣安化縣教

諭歸隱九峯成祖師起北平振作吳王溥歌以斥之尋卒

攜李詩繫作一夕死於虎

有釣鰲海客雲間清嘯二集

張弼字汝弼華亭人成化二年進士授兵部主事轉員外郎出知南安府府當兩廣要衝亡命子聚山谷爲民害弼至悉平之有誣人劫財陷一家數人於死者立辨出之大庾嶺商貨往來民素賴其雇直之利後奪於南雄遂以貧瘠弼請中分之又以其路險隘取商稅僦工闢使寬平架橋甃石二十里以便行者毀淫祠爲社學立張九齡劉安世濂谿二程及李綱祠爲學者標準成化二十年謝病歸民相與立生祠嶺下又數請縣移文候安否二十三年卒

年六十三弼襟度恬曠敦尚行履以風節自持談論必以
理勝詩清健有風致尤以草書名四方求者無虛日晚號
東海翁築梅居于鳳凰山著有東海稿行世

莫如忠字子良華亭人嘉靖十七年進士授禮部主事會
部議孝烈皇后耐廟祧仁宗力持不可坐奪俸故相楊一
清易名未定疏請得諡文襄士論以爲當擢貴州學政道
遠不能將母投檄歸前後家食者十五年會終母喪補湖
廣副使陞河南參政領京糧道洗刷一清進陝西按察使
持法詳慎陞浙江布政使乞歸初夏言中讒死諸門下率
首鼠避如忠獨經紀其喪包節逮繫詔獄瀕死治橐餽保

護之工古文詩辭書法二王一時詞翰遠近購之如忠嘗
築鳳山樓居于鳳凰山子是龍別有傳

馮淮字會東初居崑山之安亭繼遷盤龍嘉靖中上海陸
深偶至其地見淮詩大加稱賞其名以顯深子楫遂以江
上別業爲贈有雪竹軒歸有光記之二子遷邃俱能詩事
淮以孝聞後日本入寇乃走上海潘錄事爲分宅居之淮
性蕭灑恥干謁暮年家益落興益豪遊吳越名山兼歷匡
廬武夷諸勝至輒有詩遷字子喬監司知其名檄邑令以
束帛禮於其廬終不詣謝後卒沈明臣有六傷詩其一蓋
爲遷作也遷字子潛號萬峯嘗以踐更赴公庭知縣屠隆

問得其名遽令易服延坐遂傲然無所讓時人兩賢之淮
有江臯集遷有長鍊齋集遂有南遊稿雲水道人集
吳孺子字少君浙江蘭谿人不治生業所寄泊常在山村
野店僧房道院間性好竒游雁宕絕糧四十日惟以蘆蕪
爲食王世貞沈明臣何良俊兄弟皆與友善至松江章憲
文推白石山房以居之匏冠道服終日淪茗焚香罕與俗
接有一曲几以萬歲藤爲之袁福徵偶折其足持鐵如意
起而詬厲福徵起避去又愛一瓠遇盜擊破之抱而泣者
數日憲文欲割佗山爲墓地孺子不欲久之往無錫年八
十一卒

董其昌字思白號元宰華亭人萬歷十七年進士由翰林
歷官至禮部尚書天才高逸書畫妙天下常寓谷水塔院
養疴三月陳繼儒挾所藏木瘦爐王右軍月半帖吳道子
觀音變相圖宋板華嚴經至丈室中一床對坐評玩不倦
亦時造繼儒山居絃詩鬪酒人望之如仙其至青浦也主
雷宸甫家爲志其父東華墓並爲書刻諸石縣學生黃訓
元父名崇道爲青浦鄉飲賓其昌題其居曰棣華堂亦常
主於其家

張鼎字世調華亭人萬歷三十二年進士選庶吉士授檢
閱進司業歷諭德擢南京禮部侍郎加太子賓客嘗卜居

青浦天啟中以忤璫削籍崇禎初起掌詹事府兼吏部侍郎卒於家贈禮部尚書

夏允彝字彞仲號瑗公好古博學善屬文是時蘇州張溥楊廷樞慕東林之學結復社允彝與同邑陳子龍徐孚遠輩亦結幾社以相應和風動海內崇禎十年與子龍同成進士授長樂知縣善治疑獄多異政吏部尚書鄭三俊舉天下廉能知縣七人以允彝爲首帝召見大臣方岳貢等力稱其賢將特擢會丁母憂未及用北都變聞允彝走謁史可法擢吏部考功司主事疏請終制不赴允彝女適嘉定諸生侯洵洵有才早歿女遂結廬青龍江撫孤守節允

彝往依之松江城破允彝與女訣別乙酉八月泊舟崧塘佯作登岸狀出不意急赴水水淺僅及胸低頭自伏而絕背衣猶未濕也後二年兄之旭子完淳並以陳子龍事牽連坐法死完淳有異才死時年止十有七所著玉樊堂集爲世所稱

本朝

金起士字懷節嘉定人父德開工詩以順治二年死於兵起士窺跡青龍寺作七哭詩詞致酸楚歸卒於家有蘭陽鵲化二章

陸隴其字稼書浙江平湖人康熙九年進士知嘉定靈壽

青浦縣志 卷三十一
二縣治行爲天下首徵入試四川道御史未幾罷歸雍正
年間贈內閣學士諡清獻從祀孔子廟廷向居柳濱曾館
於珠街鎮席氏前後四年教其弟子席漢翼漢廷嘗謂學
在通經致知力行不可偏廢平居宜將小學一書時時省
察出門以謹身爲第一義稍有以不安命之說進者戒勿
聽其切寔真至昌明聖學爲紫陽第一功臣

曹榮字聲初號知非華亭籍祖鑄萬歷二十五年舉人官
江西都昌縣知縣榮從學於青浦許氏許愛其才妻以女
因家焉順治五年補青浦縣學生工詩與田茂遇計南陽
沈浩然諸人爲友所著詩文從孫侍讀學士爾堪序之又

刻其法戒編行世子鳴霄孫爾謹俱有才名鳴霄有深柳
堂集爾謹有梧桐軒集

曹偉謨字次典歲貢生少游夏允彝之門工時文馳聲文
社四十年嘗游西湖坐客豪談無忌旁有指者曰此江南
次典先生也會識與否舉座默然改容其爲時所重如此
後依其叔鳴霄以居與諸嗣郢王原倡和所著有南陔集
及丹生字山夫浙江嘉興人博學工詩往來吳越間知縣
魏球輯邑志招與纂修寓青浦最久尋寓楓橋垂老落魄
卒以貧死先是吳興祚爲無錫知縣愛其詩文後興祚爲
浙閩總督聞丹生歿遣人塋之寒山寺側雲間董含過其

所居云老死寒山古寺東詩人飄泊嘆途窮故交萬里收
遺骨薄俗猶存掛劍風

栢古字斯民一字雪耘浙江嘉善之白牛涇人簞瓢屢空
喜作山水遊寓西湖冒雨執繖上北高峯頂曰此真米南
宮高房山藍本也時至珠街鎮寓圓津禪院每當賓客宴
集輒袖其所作掀髯雜誦旁若無人又嘗出遇耕牛揖之
曰此真不素餐者人以爲癡不知其胸中介然也子立本
號吟山畫理精妙入宋元人之室父子偕隱泊如也後有
許宗渾者字箕山居白鶴江好吟咏工繪事與任潢交最
深性情蕭曠其所栖止往往在琳宮佛院間與栢氏父子

名相埒焉


鄂會字幼輿浙江仁和人本姓岳宋鄂王飛之後耽吟咏
篆刻尤工妻顧氏名嫺字啟姬亦能詩工書翰嫺父之繡
青浦縣丞會因移家寓焉與王原交厚會偕嫺入京師久
之不偶而歸晚授經於秦錦家子林昂曾有句云閒看山
妻臨晉帖喜聞穉子讀葩經風致可想也林昂字俯旃縣
學生其妻包媪女爾庚女孫昂子錦堂亦諸生顧嫺另有
傳

張鵬翀字天屏號南華嘉定人雍正五年進士爲孝廉時
嘗往來九峰三泖間至青浦主張翀家鵬翀善山水藝林

爭購之而翀亦以畫擅場兩相得也鵬翀通籍後由翰詹
洊歷內閣學士詩筆敏異有才子之稱賞花釣魚蒙
恩甚渥其詩文集行世已久

葛景中字運乘號石洲崑山縣學廩生明太常卿錫璠曾
孫好施與親友有急者出修脯應之為時文精雅詩亦工
駢體兼長學使者歲科試輒冠其曹設教有法四方爭延
之中年授徒于珠街鎮從之遊多成材者晚以歲貢選來
安訓導嚴立規條修飭學舍甫周歲以病卒於官年六十
有九

蔡瓏字文舟少從何焯張景崧遊居崑山縣之茜墩墩東
距嘉定安亭鎮四十里蓋歸有光所居而顧處士炎亦崑
山人故其學私淑於兩人者為多為人誠信質慈寡嗜慾
教人以盡倫篤行讀書好古為要遷珠街鎮從遊者屢盈
戶外屢試不遇由歲貢選為崑山縣訓導以師道為已任
董率勸勉諸生聞其言往往感激愧厲至有泣下改悔者
居五年致仕歸乾隆三十一年病卒



文政癸未

